
**ԱՔԵՄԵՆՅԱՆ ՊԱՐՄԿԱՍՏԱՆԻ XI ԵՎ
XV ՍԱՏՐԱՊՈՒԹՅՈՒՆՆԵՐԻ ՏԵՂԱԴՐՈՒԹՅԱՆ ՇՈՒՐՁ**

ԽՈՐԻԿՅԱՆ Հ. Գ.

Պատմահայր Հերոդոտոսը, անդրադառնալով Աքեմենյան Պարսկաստանի XI սատրապությանը, գրում է. «Կասպերը, պալսիկները, պանտիմաթները և դարեյտները մեկ նահանգ կազմած, վճարում էին երկու հարյուր տաղանդ: Սա էլ տասնմեկերորդ նահանգն էր»¹: Պատմահայրը կասպերին հիշատակում է նաև XV սատրապության մեջ. «Սակերը և կասպերը վճարում էին երկու հարյուր հիսուն տաղանդ. սա տասնհինգերորդ նահանգն էր»²: Կասպերին հեղինակը հիշատակում է նաև Քսերքսեսի հունական արշավանքին մասնակցող ցեղերի ու ժողովուրդների շարքում. «Կասպերը արշավել էին այժենի հագած, և իրենց տեղական եղեգնյա աղեղներով ու ակինակներով զինված: Նրանց հանդերձանքը այսպիսին էր, իսկ նրանց առաջնորդն էր Արտյուփիոսի եղբայր Արիոմարդոսը»³: Կասպերը և պարեկանիները, ըստ Պատմահոր, տրամադրել էին նաև հեծյալներ, որոնք նույնպես զինված էին իրենց հետևակի նման⁴: Հերոդոտոսը հաղորդում է, որ արշավանքին մասնակցում էին նաև սակերը. «Բակտրիացիները արշավում էին, գլուխներին մեղական գլխարկների նման գլխարկներով և եղեգնյա տեղական աղեղներով ու կարճ նիզակներով: Իսկ սակերը, որոնք սկյութներ են, գլուխներին կրում էին սրածայր բարձր գդակ, հագնում անդրավարտիք և զինված էին իրենց տեղական աղեղներով, դաշույններով, ինչպես նաև սագարիս (կոչված) սակրերով: Սրանց, որոնք սկյութներ էին, կոչում էին ամյուրգյան սակեր: Բակտրիացիներին ու սակերին առաջնորդում էր Հյուստասպեսը, Դարեհի և Ատոսասայի Կյուրոսի դստեր, որդին»⁵: Բերված վկայություններում, ինչպես տեսնում ենք, կան որոշակի հակասություններ: Եթե սատրապությունների ցուցակում Հերոդոտոսը հիշատակում է կասպերի երկու առանձին խմբերի մասին, ապա Քսերքսեսի հունական արշավանքի ժամանակ կասպերը հիշատակվում են որպես մեկ միասնական խումբ, որը հանդես է գալիս մեկ հրամանատարության ներքո: Ըստ որում, ինչպես կտեսնենք ստորև, կասպերի մյուս հատվածը ևս հիշատակվում է այդ արշավանքի ժամանակ, միայն թե այլ անվամբ:

XI սատրապության կասպերին ուսումնասիրողները սովորաբար առանձնացնում են XV սատրապության կասպերից: XI սատրապության կասպերին ուսումնասիրողների մեծ մասը տեղադրում է Կասպից ծովի հարավարևմտյան

¹ **Հերոդոտոս**, Պատմություն ինը գրքից (թարգմանությունը Սիմոն Կրկյաշարյանի), Ե., 1986, III, 92:

² Նույն տեղում, III, 93:

³ Նույն տեղում, VII, 67:

⁴ Նույն տեղում, VII, 86:

⁵ Նույն տեղում, VII, 64:

ափերին՝ Ափշերոնի թերակղզուց դեպի հարավ⁶։ Կասպերին տեղադրում են նաև Կասպից ծովի հարավային առափնյա շրջանում՝ Մարաստանից հյուսիս-արևելք⁷։ Ե. Հերցֆելդը կասպերին տեղադրում է Կասպից ծովից հարավ-արևմուտք և հարավ՝ կարծելով, որ այս կասպերի անունից է առաջացել Կասպիական դռներ անվանումը⁸։ Կան, ըստ էության, երկու Կասպիական դռներ, մեկը՝ Ռագայի մոտ, իսկ մյուսը՝ Թալիշի լեռներում։ Նշենք, որ այս տեսակետները հետազոտողները հիմնավորում են սկզբնաղբյուրների տեղեկություններով։ Սակայն սկզբնաղբյուրների ուսումնասիրությունը, օրինակ, Հ. Սվազյանին հիմք է տվել XI սատրապությունը տեղադրելու Այսրկովկասում, որը հյուսիսից ամփոփված է եղել Կովկասյան լեռնաշղթայի հարավային փեշերի, արևելքից՝ Կասպից ծովի, հարավից՝ Կուր գետի, իսկ արևմուտքից՝ Ալազան գետի միջև։ Այս տարածքում, ըստ հեղինակի, պետք է փնտրել նաև կասպերի հետ հիշատակվող պալսիկներին, պանտիմաթներին և դարեյտներին⁹։ Սակայն, եթե էլենք միայն այն իրողությունից, որ դարեյտների տեղադրությունը սկզբնաղբյուրներում հստակ է (տե՛ս ստորև), ապա այս տեսակետը քննություն չի բռնում։ Ի. Դյակոնովը կասպերի զգեստը և սպառազինությունը բնորոշ է համարում նաև մ.թ.ա. I հազարամյակի մանացիների և մարերի համար¹⁰, այսինքն՝ նրանց համարում է այսրկովկասյան ցեղ։ Հեղինակը ենթադրում է, որ պալսիկները, պանտիմաթները և դարեյտները եղել են միգրացե կադուսիների (կատիշներ - Խ. Հ.) և մյուս անարիակների առանձին ցեղեր, որոնք բնակվել են հյուսիսում, իբր, ուտիների և աղվանների և արևելքում՝ վրկանների միջև ընկած մերձկասպյան տարածքում¹¹։ Ի. Ալիևը բոլոր երեք ցեղերին տեղադրում է հին Կասպիանեի հարևանությամբ¹²։

Ուսումնասիրողների շրջանում կարծիքները բաժանվում են նաև XV սատրապության տեղադրության հարցում։ Որոշ հետազոտողներ XV սատրապության կասպերին հատկացնում են Հինդուքուշից հարավ ընկած շրջանները (Քաֆիրիստան-Նուրիստան և Զիտալ)¹³։ Վ. Ստրովեն XV սատրապության կասպերին տեղադրում է Արալյան ծովից արևելք (ընդ որում՝ Արալյան ծովը դիտարկելով որպես Կասպից ծովի շարունակություն)։ Նա կարծում է, որ կասպերը նույնանում են սակերին, որոնք բնակվում են Սոգդից այն կողմ, և Դարեհ I-ի օրոք կազմել են ծովից այն կողմ գտնվող սակերի հատուկ շրջանը։ Ըստ հեղինակի,

⁶ Доватур А. И., Каллистов Д. П., Шишова И. А., *Народы нашей страны в "Истории" Геродота*, М., 1982, с. 196, прим. 101 (այսուհետև՝ Դ. Կ. III)։

⁷ Նույն տեղում։

⁸ Herzfeld E., *The Persian Empire. Studies in Geography and Ethnography of the Ancient Near East*, Wiesbaden, 1968, p. 196.

⁹ Սվազյան Հ., Կասպերի ցեղային միություններն Աքեմենյան Պարսկաստանի տիրապետության շրջանում (մթա. VI դ.- մթա. IV դ.), (ՀՀ ԳԱԱ Լրաբեր հասարակական գիտությունների (այսուհետև՝ ԼՀԳ), 1983, N 6, էջ 89)։

¹⁰ Дьяконов И. М., *История Мидии*, М.-Л., 1956, с. 103, 364.

¹¹ Նույն տեղում, էջ 447։

¹² Алиев И., *История Мидии*, Баку, 1960, с. 104, прим. 9.

¹³ Դ. Կ. III., էջ 196, ծնթ. 101։

Արայյան ծովից արևելք գտնվող այս սակերին հույն հեղինակներն անվանում էին մասսագետներ և դահեր, որոնցից ծովափնյա շրջանում գտնվողները կոչվել են կասպեր¹⁴։ Պատմագիտության մեջ առաջարկություններ են եղել **κά σπιολι**-ն ուղղել **κά σπειρολι**, **κά σιολι**, **Πάκτυες**¹⁵։ Հ. Շտեյնը հրաժարվում է լուծել կասպերի հարաբերության հարցը **κά σπειρολι**-ին կամ **κά σπεραϊοι**-ին, կամ էլ Կասպապյուրոս-Քաբուլին և սրբագրում է **Πάκτυες**¹⁶։

Սակայն այս առաջարկություններն ավելի շուտ նոր հարցեր են ծնում, քան պատասխան տալիս քննարկվող հարցերին։ Ուսումնասիրողների շրջանում փորձեր են եղել նաև XV սատրապությունը տեղադրել Այսրկովկասում¹⁷։ Սակայն, ինչպես ցույց են տալիս վերջին ուսումնասիրությունները, Այսրկովկասում և՛ XI, և՛ XV սատրապությունների տեղադրության ամեն մի փորձ մատնված է անհաջողության։ Անդրադառնալով կասպերի խնդրին՝ Բ. Հարությունյանը ցույց է տվել, որ Կովկասյան լեռների և Կուր գետի միջև ընկած տարածքում գտնվել է XVIII սատրապությունը¹⁸։ Հետևաբար, պետք է ճիշտ լինեն այն ուսումնասիրողները, որոնք առաջարկում են XI և XV սատրապությունները տեղադրել Միջին Ասիայում։

Ու. Հաուն և Ջ. Ուելսը ենթադրել են, որ XV սատրապության կասպերը կարող են լինել Քաշմիրի բնակիչները, թեև նման տեղադրությունը համարել են կասկածելի։ Միաժամանակ, նրանք ենթադրում էին, որ XI սատրապության կասպերը փոխարինում են Վրկանին, որի բացակայությունը սատրապությունների ցուցակում զարմանք է հարուցում¹⁹։ Համաձայնվելով այս ենթադրության հետ՝ Բ. Հարությունյանը փորձում է ապացուցել, որ XI սատրապությունը գտնվել է Վրկանի և շրջակա տարածքներում²⁰։ Ա. Հակոբյանի կարծիքով ևս, XI սատրապությունը գտնվել է Վրկանում, իսկ XV սատրապության սակերին նույնացնելով Հերոդոտոսի «ամյուրգյան սկյութներին», որոնք Բեհիսթունի արձանագրության «հաումավարգյան սակերն» են, տեղադրում է վրկաններից հյուսիս՝ արևմտյան Թուրքմենիայի ներքին շրջաններում։ Նրա կարծիքով, երկու սատրապությունների կասպերը պետք է հարևաններ լինեին, քանի որ Քսերքսեսի բանակում կովել են

¹⁴ Струве В. В., *Этюды по истории Северного Причерноморья, Кавказа и Средней Азии*, Л., 1968, с. 55, 110.

¹⁵ Д. К. III., էջ 395, ծնթ. 764:

¹⁶ Նույն տեղում, էջ 196, ծնթ. 101, էջ 395, ծնթ. 764:

¹⁷ Тер-Мартirosов Ф. И., *Границы ахеменидских владений в Закавказье* (Պատմաբանասիրական հանդես (այսուհետև՝ ՊԲՀ), 1998, 3, էջ 140): Меликов Р., *Этническая картина Азербайджана в период Ахеменидского владычества (VI-IV вв. до н. э.)*, Баку, 2003, с. 103.

¹⁸ Հարությունյան Բ. Հ., Արեմենյան Պարսկաստանի XVIII սատրապության տեղադրության շուրջ (Հանդես Ամսօրեայ Վիեննա, 1999, էջ 45-114):

¹⁹ How W. W., Wells J., *A Commentary on Herodotus*, Oxford, 1928, I-II. տե՛ս Դ. К. III., էջ 196, ծնթ. 101:

²⁰ Հարությունյան Բ. Հ., նշվ. աշխ., էջ 87-98:

միննույն ջոկատում²¹: Սակայն հեղինակի ենթադրությունը դժվար չէ մերժել հետևյալ կարևոր իրողությամբ: Հերոդոտոսը հաղորդում է, որ «յուրաքանչյուր ազգի նա (Դարեհ I-ը - Խ. Հ.) կցեց մերձակա հարևաններին և, բացի այդ, հեռավոր ազգություններին միացրեց այս կամ այն իշխանությանը»²²: Այս տեղեկություններից կարելի է եզրակացնել, որ պարսից արքունիքի նպատակը եղել է ոչ թե որևէ էթնոսի բաժանումը տարբեր սատրապությունների միջև, այլ մի քանիսին մեկ վարչական շրջանի մեջ միավորելը: Ուստի և Ա. Հակոբյանի կողմից XI սատրապության հարևանությամբ XV սատրապության տեղադրությունն անընդունելի է: Ի. Դյակոնովը XV սատրապության կասպերին տեղադրում է Կասպից ծովից արևելք մերձկասպյան սակերի հարևանությամբ, իսկ նույն սատրապության սակերը Բեհիսթունի արձանագրության *Sak* երկրի ժողովուրդն է: Ինչևէ, ուսումնասիրողը XV սատրապության հարցը բաց է համարում²³, և այդ բացը կփորձենք լրացնել մեր քննության արդյունքներով: XI և XV սատրապությունների տեղադրության վերաբերյալ քննության առնենք մի քանի խնդիրներ: XI սատրապության ցեղերից առավել հստակ տեղադրվում են դարեյոսները, որոնց Պտղոմեոսը տեղադրում է Կասպից ծովից հարավ՝ ներկայիս Ռեյ (պատմական Ռագա) քաղաքի մերձակայքում²⁴: Պավսիկները, մեր կարծիքով, Պոմպոնիոս Մելայի պեստիկներն են (*Pestici*), որոնք հիշատակվում են ամարդների և դերբիկների միջև: Մեկ այլ կապակցությամբ պատմիչը, խոսելով Յաքսարտի և Օքսոսի մասին, գրում է, որ երկրորդը, արևելքից արևմուտք հոսելով առաջին անգամ շրջվում է դահերին մոտ և հոսանքն ուղղելով դեպի հյուսիս՝ գետաբերանը բացում է ամարդների և պեսիկների (*Paesicas*) միջև²⁵: Գրեթե կասկած չի մնում, որ Մելայի երկրորդ հիշատակության պեսիկները նույն պեստիկներն են: Ամարդները կամ մարդերը զբաղեցրել են ներկայիս Կըզըլ-Ուզեն գետի (պատմական Ամարդոսի) միջին և ստորին հոսանքի շրջանները մինչև գետաբերան, իսկ դերբիկները բնակվել են Կասպից ծովի մերձափնյա շրջանում՝ վրկաններից հյուսիս: Ելնելով XI սատրապության ցեղերի թվարկման հաջորդականությունից՝ պավսիկները պետք է գտնվեին կասպերից հարավ և հարավ-արևմուտք: Օքսոսը Մելայի երկրորդ հիշատակության մեջ նույնանում է ոչ թե այսօրվա Ամու-Դարյային, այլ Ատրեքին կամ ավելի ճիշտ՝ Գորգանին: Պլինիոս Ավագը պեստիկներին հիշատակում է որպես սկյութական ցեղ²⁶: Պավսիկների հետ

²¹ **Հակոբյան Ա.**, Կասպերի և Կասպիանա (Կասպք) մարզի տեղադրության մասին (ԼՀԳ, 1983, N 1, էջ 91), Նույնի՝ *Албания-Алуанк в греко-латинских и древнеармянских источниках*, Е., 1987, с. 45-46.

²² Հերոդոտոս, III, 89:

²³ **Дьяконов И. М.**, նշվ. աշխ., էջ 360:.

²⁴ *Claudii Ptolemaei Geographia, edidit Carolus Fredericus Augustus Noebbe, tom I, Lipsiae, 1843, lib. VI, cap. 2, § 6.*

²⁵ **Латышев В. В.**, *Известия древних писателей о Скифии и Кавказе [Вестник древней истории (այսուհետև՝ ВДИ), 1949, N 1, с.284-285].*

²⁶ *ВДИ, 1949, 2, с. 306.*

նույնանում են նաև Պտղոմեոսի պասիկները²⁷: Ելնելով ասվածից՝ կարելի է կարծել, որ պավսիկները գտնվել են Կասպից ծովի հարավային ափերին, համենայն դեպս, դարեյոսներից արևելք, և եղել են սկյութական ցեղ:

Վերևում նշեցինք, որ ըստ պատմագիտական գրականության մեջ եղած կարծիքի՝ XI սատրապության կասպերը փոխարինում են Վրկանին: Որոնք են այն կովանները, որոնք կարող են տվյալ տեսակետի հիմք լինել: Չնայած վրկանները սատրապությունների հերոդոտյան ցուցակում չեն հիշատակվում, Պատմահայրը տեղյակ է նրանց գոյությանը: Ըստ Հերոդոտոսի՝ «Ասիայում կա մի դաշտավայր, բոլոր կողմերից լեռներով շրջապատված, իսկ այդ լեռներով անցնում են հինգ նեղ կիրճեր: Այս դաշտավայրը հնում պատկանել է քորասմներին և գտնվում է նույն քորասմների, հյուրկանների, պարթևների, սարանգների և թամանների սահմաններում: Պարսից իշխանության հաստատումից հետո այն արդեն պատկանում է (պարսից) արքային»²⁸: Պատմահոր մյուս հաղորդմամբ՝ «Հյուրկանները ևս զինված էին պարսիկների նման, նրանց առաջնորդն էր Մեգապանոսը, որը հետագայում դարձավ Բաբելոնի կառավարիչ»²⁹: Հերոդոտոսի առաջին տեղեկությունից երևում է, որ քորասմների և պարթևների միջև հիշատակվող հյուրկանները գտնվել են Կասպից ծովի հարավարևելյան շրջանում, իսկ երկրորդ հիշատակության մեջ միննույն սպառազինությունը ցույց է տալիս հյուրկանների և պարսիկների ընդհանուր իրանական ծագումը և, բացի այդ, կարևոր է նկատի ունենալ, որ հյուրկանները Քսերքսեսի բանակում հիշատակված են պարսիկներից, մեդացիներից, կիսսիացիներից հետո, որը ցույց է տալիս Աքեմենյան տերությունում նրանց տեղը և դերը: Հերոդոտոսի տեղեկությունների պարզաբանման կարևոր սկզբնաղբյուր է Բեհիսթունի արձանագրությունը, որտեղ Վրկանը չի հիշատակվում հպատակ երկրների թվում, սակայն նշվում է նույն արձանագրության մեկ այլ հատվածում. «Պարթևն ու Վարկանան իմ (Դարեհ I-ի - Խ. Հ.) դեմ ապստամբեցին և հարեցին Ֆրավարտիշին»³⁰: Ինչպես երևում է, Պարթևստանն ու Վրկանը կազմել են մեկ երկիր, որի կառավարիչը մինչ ապստամբությունը եղել է Վշտասպը՝ Դարեհ I-ի հայրը: Ապստամբությունը ճնշելուց հետո Դարեհը հայտնում է, որ այդ է իր կատարածը Պարթևստանում: Ուստի պետք է կարծել, որ Վրկանը մտել է Պարթևստանի մեջ: Համեմատության համար նշենք, որ Մարգիանա երկրում ապստամբությունը ճնշելուց հետո Դարեհը կրկին հայտնում է, որ այդ է իր կատարածը Բակտրիայում³¹: Հետևաբար, Մարգիանան մտել է Բակտրիայի մեջ, և պատահական չէ, որ նույնպես չի հիշատակվում Բեհիսթունի արձանագրության հպատակ երկրների շարքում: Ֆրավարտիշի ապստամբությունը ճնշելուց հետո Վրկանն առանձնացվում է Պարթևստանից, իսկ վերջինս մտնում է XVI սատրապության մեջ: Սակայն Դարեհ

²⁷ Claudii Ptolemaei *Geographia*, VI, 12, 4.

²⁸ Հերոդոտոս, III, 117:

²⁹ Նույն տեղում, VII, 62:

³⁰ Kent R. G., *Old Persian, Grammar, Texts, Lexicon*. New Haven, 1953, p. 124, 127, Lecoq P., *Les inscriptions de la Perse achéménide*, Paris, 1997, p. 200.

³¹ Kent R.G., նշվ. աշխ., էջ 127, Lecoq P., նշվ. աշխ., էջ 201-202:

III-ի օրոք Վրկանը և Պարթևստանը կրկին հայտնվում են մեկ սատրապության մեջ³²:

Կասպ-վրկան նույնությանը Բ. Հարությունյանը անդրադառնում է հետևյալ տեսանկյունից: Ըստ նրա՝ «Աշխարհացոյց»-ի մեջ հիշատակվող վրացական Վարջանը (Իբերիան կամ Վիրքը - Խ. Հ.) պետք է սերտ աղերս ունենա Վրկան կամ Վարկան երկրանվան հետ, և հետաքրքիր է նաև, որ Վիրքի Վարջան անվանը ուղեկցում են Կասպի քաղաքի և Կովկասյան լեռների տրված Կասպիական լեռներ անվանումները: Շարունակելով միտքը՝ հեղինակը եզրակացնում է, որ Վարկանը կամ Վարգանը պետք է ծագեր «գայլ» բառից և նշանակել է «Գայլի երկիր», ուրեմն էթնոնիմը առաջացել է ցեղային տոտեմ հանդիսացած «գայլ» անունից: Բ. Հարությունյանը ենթադրում է, որ կասպ-վրկանների մի մասը, դատելով կցկտուր անուղղակի նյութից, հաստատվում է Արևելյան Վրաստանի տարածքում՝ նրան փոխանցելով Վրկան-Վարկան-Վարջան, իսկ նրա քաղաքներից մեկին՝ Կասպի անունը, և կարելի է ենթադրել, որ այդ տեղաշարժը կատարվել է, թերևս, Դարեհ I-ի վարչական վերակառուցումներից և Ալեքսանդր Մակեդոնացու արշավանքներից հետո՝ հիմք ունենալով կասպերի Հյուսիսային Կովկասում գտնվելը³³: Ասվածը ցույց է տալիս, որ կասպ-վրկան նույնության հնարավորությունն ինչպես տրամաբանական էր Վրկանից աշխարհի բնակչության համար, այնպես էլ իրական է Վիրքի առնչությամբ: Սկզբնաղբյուրներում կան որոշ տեղեկություններ, որոնք արձանագրում են վրկանների գոյությունն Այսրկովկասում: Հովսեպոս Փլավիոսը գրում է. «Իսկ թե ալանաց ազգը, որը բնակեցրել է Տանայիս գետը և Մեոտիս լճի շրջակայքը, սկյութացիներ են, մենք հայտնել ենք դեռ նախապես մեկ այլ տեղ: Ահա նրանք այդ ժամանակները նպատակ ունենալով արշավել Մեդիա և նրանից ավելի այն կողմ ընկած այլ վայրեր ավարառության համար, համաձայնության են գալիս հյուրկանների թագավորի հետ, որը տերն էր այն անցուղու, որ Ալեքսանդր (Մակեդոնացի) թագավորը փակել էր երկաթյա ամուր դարպասներով: Ու քանի որ այդ մուտքը նրանց տրամադրեց, ապա նրանք հոծ բազմությամբ հարձակվեցին մեդացիների վրա...»³⁴: Հ. Մանանդյանը կարծում է, որ հյուրկանների թագավորը վրաց

³² Արիանոս, Ալեքսանդրի արշավանքը, էջ 116, 193 (Արիանոսի և Ռուփոսի աշխատությունները հայերեն հրատարակված են մեկ գրքով. «Ալեքսանդր Մակեդոնացի», Ե., 1987):

³³ **Հարությունյան Բ. Հ.**, նշվ. աշխ., էջ 96-97: Տե՛ս նաև հեղինակի գրախոսությունը (**Райф Меликов**, *Этническая картина Азербайджана в период Ахеменидского владычества (VI-IV вв. до н. э.)*, (Գիտության գլոբուս, հ. 5, 2005, էջ 143-147): Պևտինգերյան քարտեզի *Caspiae* կայանը (ներկայիս Խոսպիան) Ախալքալաք քաղաքից հարավ (Տե՛ս **Манандян Я.**, *Круговой путь Помпея в Закавказье* (Труды, т. V, Е., 1984, с. 226), մեր կարծիքով, կապված է կասպերի հետ: Հ. Մանանդյանը Դիոն Կասիոսի Ասպիսը ուղղում է *Κασπίς* և նույնացնում *Caspiae* կայանի հետ (նույն տեղում, էջ 235): Հետաքրքիր է, որ Ե. Հերցֆելդը Կասպ անունը ուզում է տեսնել Կազբեկ լեռնազագաթի անվան մեջ (**Herzfeld E.**, նշվ. աշխ., էջ 197):

³⁴ **Հովսեպոս Փլավիոս**, Հրեական պատերազմի մասին (թարգմանություն բնագրից, առաջաբան և ծանոթագրություններ **Ս. Մ. Կրկյաշարյանի**), Ե., 1976, էջ 52:

թագավորն է³⁵։ Մեր կարծիքով, դա չի բացառվում, սակայն Այսրկովկասի արևելքում կասպ-վրկանների առկայությունը կարող է վերաբերել հենց նրանց, եթե անցումը նույնացնենք Դերբենդի լեռնանցքի հետ, եթե իհարկե խոսքը չի վերաբերում Ալանաց դռներին։ Առավել հետաքրքիր տեղեկություն է հաղորդում Դիոնիսիոսը. «Փասիսը,- գրում է նա,- սկիզբ է առնում Արմենական լեռից։ Նրանից հյուսիս-արևելք՝ Կասպից և Եվքսինյան ծովերի միջև, ընկած է պարանոց։ Նրա վրա ապրում է իբերներ արևելյան ժողովուրդը, որոնք մի ժամանակ արևելք էին եկել Պիրենեյներից և դաժան պատերազմի մեջ մտել հյուրկանների հետ...»³⁶։ Սույն վկայությունը վերաշարադրում է նաև Եվստաթիոսը, ըստ որի՝ Արմենական լեռը, որտեղից սկիզբ է առնում Փասիսը, գտնվում է Հյուրկանիայի սկզբին («այնտեղ որտեղ սկսվում է Հյուրկանիան»), և հյուրկաններին համարում արևելյան իբերների բնական թըշնամիները³⁷։ Արմենական լեռը համապատասխանում է Մոսքական լեռներին, իսկ Փասիսը ներկայիս Ռիոնի գետի վտակ Ղվիրիլան է, որից հյուսիս-արևելք Հյուրկանիան է՝ Վիրքը։ Բերված տեղեկություններում, ինչ խոսք, իբերները չեն կարող նույնանալ Պիրենեյների իբերների հետ, չնայած որ շատ հեղինակներ նրանց նույնացնում են, և այդ պատճառով էլ, ըստ էության, հյուրկանները կարծես թե բնիկներ են, երբ դատելով աղբյուրներից՝ նրանք էին գաղթել Այսրկովկաս։ Ըստ Պոմպոնիոս Մելայի Կյուրոս (Կուր - Խ. Հ.) և Կամբյուսես (Իորի - Խ. Հ.) գետերն առանձին-առանձին հոսում են իբերների և հյուրկանների հողերով, այնուհետև ծովից ոչ հեռու թափվում միևնույն գետը և մի հունով հասնում մինչև Վրկանից ծովածոց³⁸։ Վրկանների տակ կարելի է հասկանալ նաև աղվաններին, որպես աղվանական ցեղերից մեկը, եթե նկատի ունենանք գետի միջին և ստորին հոսանքը, սակայն նկատի ունենալով, որ Իորի գետի վերին հոսանքը գտնվել է Վիրքում, ապա վրկանները կտեղադրվեն կրկին Վիրքում։ Ինչպես տեսնում ենք, որոշ հեղինակներ վրկաններին դեռևս տարբերել են իբերներից, երբ հետազայում երկու էթնոսները որոշակիորեն նույնացվում են։ Հետաքրքիր է, որ սկզբնաղբյուրներում վրկանները հանդես են գալիս նաև բորկաններ³⁹, բարկաններ⁴⁰ անվանաձևերով, թեև տվյալ վկայություններում ներկայանում են

³⁵ Մանանդյան Հ., Քննական տեսություն հայ ժողովրդի պատմության (Երկեր, հ. Բ, Ե., 1978, էջ 14), տե՛ս նաև **Հակոբյան Ա.Հ.**, Գարգարացիները ըստ անտիկ և հայկական սկզբնաղբյուրների (ՊԲՀ, 1982, N 4, էջ 125)։

³⁶ *ВДИ, 1948, N 1, с. 240.*

³⁷ Նույն տեղում, էջ 253։

³⁸ Նույն տեղում, 1949, N 1, էջ 289։

³⁹ **Դիոդորոս Սիկիլիացի**, Պատմական գրադարան (թարգմանություն բնագրից, առաջաբան և ծանոթագրություններ **Ս. Մ. Կրկյաշարյանի**), Ե., 1985, էջ 17։

⁴⁰ **Ռուփոս**, Ալեքսանդր Մակեդոնացու պատմությունը, էջ 282։ Բորկաններ-բարկաններ և հյուրկաններ հարցի մասին տե՛ս **Пьянков И. В.**, «История Персии» Ктесия и среднеазиатские сатрапии Ахеменидов в конце V в. до н. э. (*ВДИ, 1965, CE2 с. 44-45*)։ Պատմագիտության մեջ փորձել են՝ նկատի ունենալով Վրկանի բացակայությունը Հերոդոտոսի սատրապությունների ցուցակում, Հերոդոտոսի պարիկանին նույնացնել հյուրկանի հետ (Տե՛ս **Olmstead A. T.**, *History of the Persian Empire, Third Impression, Chicago, 1960, p. 291*), որը Բ.Պյանկովը համարում է ավելորդ, քանի որ Վրկանը գտնվել է Պարթևստանի կազմում (նույն տեղում, էջ 45, ծնթ. 79)։

որպես տարբեր ցեղեր: Թերևս այս հանգամանքը՝ միևնույն ժողովրդին երկու անուններով կոչելը, վկայում է վրկանների տեղաշարժի մասին, որի արտահայտությունն է սկզբնաղբյուրներում նույն ժողովրդին առանձին ցեղեր համարելը:

Կատարված քննությունը նոր լույս է սփռում Հերոդոտոսի տեղեկությունների վրա: Փաստորեն, այն, որ Քսերքսեսի հունական արշավանքի ժամանակ վրկանները հիշատակվում են, ցույց է տալիս, որ XI սատրապության ցեղերը, բացի կասպ-վրկան կոնկրետ նույնացումից, հավաքական ամբողջությամբ ներկայացված են վրկանների անվան տակ: Միաժամանակ, կարելի է պնդել, որ XI սատրապության մնացած ցեղերը՝ պավսիկները, պանտիմաթները, դարեյտները, նույնպես ունեցել են իրանական ծագում և հանդես եկել մեկ անվան ներքո: Այսպիսով, կարող ենք պնդել, որ Քսերքսեսի բանակում կասպերի երկու խմբերը չեն միավորվել մեկ հրամանատարության ներքո, քանի որ դրանց մի հատվածը հիշատակված է բուն էթնանվամբ, իսկ մյուսը՝ ցեղային տոտեմ հանդիսացած «գայլ» անվամբ, որն աստիճանաբար դառնում է էթնոնիմ: XI սատրապության ցեղերը, ունենալով ընդհանուր ծագում, Քսերքսեսի բանակում հանդես են գալիս վրկաններ-«գայլեր» հավաքական անվան տակ, երբ սատրապությունների ցուցակում հիշատակվում են առանձին-առանձին: XI սատրապության մեջ կասպերին առաջինը նշելը ցույց է տալիս, որ նրանք «վրկանների» մեջ եղել են մեծաթիվը, որի շուրջ միավորվել են մյուս «վրկանները» (պավսիկներ, պանտիմաթներ, դարեյտներ), հետևաբար, թերևս, կարելի է մտածել, որ մինչև սատրապության ձևավորումը նշված ցեղերը կազմել են ցեղամիություն: Կասպ-վրկան նույնության պարզաբանումները միաժամանակ հնարավորություն են ընձեռում ճշտելու XV սատրապության տեղադրությունը:

Դատելով և՛ Հերոդոտոսի տվյալներից, և՛ պարսկական սեպագիր արձանագրությունների նկարագրության տրամաբանությունից՝ XV սատրապությունը, անկասկած, նույնպես գտնվել է Միջին Ասիայում: Բեհիսթունի արձանագրությունում Դարեհ I-ը թվարկում է իրեն ենթակա երկրները, որոնց թվում նաև, ըստ աշխարհագրական հերթականության, գալիս են Խորասմը, Բակտրիան, Սոգդիանան, Գանդարան, Սական (Սկյութիա - Խ. Հ.), Սատագուշը, Արաքոսիան, Մական⁴¹: Խորասմները, որոնք, համաձայն Հերոդոտոսի, այլ ժողովուրդների հետ XVI սատրապության հիմնական էթնոսներից մեկն էին, տեղադրվում են Խորեզմի շրջանում: Բակտրիան (XII սատրապության մեջ) ընդգրկել է ժամանակակից Հարավային Տաջիկստանը և Հյուսիսային Աֆղանստանը: Սոգդիանան (XVI սատրապությունում) Մարականադա կենտրոնով գտնվել է ժամանակակից Սամարղանդի և Բուխարայի շրջաններում: Ինչպես տեսնում ենք, Սոգդիանան ընկել է խորասմների և Բակտրիայի միջև, և պետք է, համաձայն աշխարհագրական հերթականության, հիշատակվեր Խորասմից հետո՝ Բակտրիայից առաջ: Գանդարան (VII սատրապությունում) տարածվել է Քարուլի և Տաքսիլայի միջև ընկած շրջանում: Սատագուշը (VII սատրա-

⁴¹ Lecoq P., նշվ. աշխ., էջ 188, Kent R. G., նշվ. աշխ., էջ 117:

պությունում սատրապություններն են) գտնվել է գանդարիներից հարավ: Արաքոսիան տեղորոշվում է ժամանակակից Ղանդահարի շրջանում: Վարչական առումով Արաքոսիան, որը չկա Հերոդոտոսի սատրապությունների ցուցակում, կարող էր մտնել XVII սատրապության մեջ, որտեղ, ըստ Հերոդոտոսի, մտնում էին պարիկանիները և Ասիայի եթովպացիները: Սակայն, որը արձանագրության մեջ հիշատակվում է Գանդարայի և Սատագուշի միջև, պետք է գտնվեր Գանդարայից հյուսիս և Բակտրիայից արևելք, քանի որ միայն այս դեպքում կունենանք այն ազատ տարածությունը, որտեղ կարող էր տեղադրվել Սակա երկիրը և Հերոդոտոսի նշած XV սատրապությունը: Տվյալ տարածքը համապատասխանում է ժամանակակից Հյուսիսային Տաջիկստանին և Ամու-Դարյայի վերին հոսանքի շրջանին՝ հարավում ձգվելով մինչև Հինդուքուշի լեռնաշղթան: Ուշագրավ է, որ Հերոդոտոսը ևս և՛ սատրապությունների ցուցակում, և՛ հույն-պարսկական պատերազմներին մասնակցող ցեղերի շարքում հիշատակում է միայն, այսպես ասած, սակերի մի հատվածին, որոնք երկու վկայությունների (III, 93, VII, 64) դեպքում էլ ակնհայտորեն կապված են Միջին Ասիայի հետ: Մա նշանակում է, որ և՛ Բեհիսթունի սակերը (Sak₂ երկրի բնակիչները), և՛ Հերոդոտոսի սակերը բացարձակապես նույնանում են: Այդ նույնացումը երկու տարբեր աղբյուրներում արտացոլված է նաև հետևյալ կերպ: Դարեհ I-ի Պերսեպոլիսի արձանագրություններից մեկում Գանդարայից, Հի(ն)դուշից հետո հիշատակվում են հաումավարգյան և «սրածայր գդակավոր» սակերը⁴²: Գանդարայի տեղադրությունը վերևում արդեն նկարագրել ենք: Հի(ն)դուշը (կամ Մինդ) հնդիկների՝ Ինդոսի արևմտյան ափի բնակիչների երկիրն է: Հաումավարգյան և *tigraxaudā* սակերը փաստորեն իրենց աշխարհագրությամբ համապատասխանում են Բեհիսթունի արձանագրության Sak₂ երկրին: Այս իրողությունը պարզ արտացոլվել է նաև Հերոդոտոսի երկում: Պատմահայրը մինևույն վկայության մեջ թեև ոչ ուղղակի հիշատակում է, ընդ որում՝ բակտրիացիներից հետո, երկու խումբ սակերի մասին «սրածայր բարձր գդակավոր» և ամյուրգյան⁴³: Տվյալ տեղեկության մեջ չնայած Հերոդոտոսը խոսում է միայն սակ-սկյութների մասին և այն էլ ընդհանրական ձևով, կա որոշակի տարբերակում (ամյուրգյան սակեր), որոնց հետ արտացոլված են նաև հաումավարգյան սակերը, որոնք իրականում Հերոդոտոսի հիշատակած ամյուրգյան սակերն են, և *tigraxaudā* սակերը, որոնք Հերոդոտոսի այն սակ-սկյութներն են, որոնք նկարագրության մեջ բնութագրվում են նաև իրենց «սրածայր բարձր գդակներով»: Սակերի մեր առաջարկած տեղադրության օգտին կարող է վկայել Դարեհ I-ի հետևյալ արձանագրությունը. «Դարեհ թագավորն ասում է. «Մա է թագավորությունը, որին ես տիրում եմ՝ Սկյութիայից, որը Սոգդիանայի այն կողմում է, մինչև Քուշ (Եթովպիա - Ի. Ն.), Մինդից (Հնդկաստանից - Ի. Ն.) մինչև Սարդես (Լյուդիա - Ի. Ն.), որը շնորհել է ինձ Ահուրամազդան, աստվածներից մեծագույնը: Թող պահպանի Ահուրամազդան ինձ և իմ արքա-

⁴² Kent R. G., նշվ. աշխ., էջ 137: Հմտ. նաև այլ արձանագրությունները:

⁴³ Հերոդոտոս, VII, 64:

յական տունը»⁴⁴։ Ինչպես տեսնում ենք, Սոգդիանայից այն կողմ (արևելք - Խ. Հ.) գտնվող Սկյութիա-Սակա երկիրը, իրոք, համապատասխանում է XV սատրապության սակերին։ Այս առումով հետաքրքիր է մատնանշել, որ Արիանոսը և Ռուփոսը նույնպես ունեն բազմաթիվ տեղեկություններ սկյութների մասին, որոնք հիշատակվում են և՛ բակտրիացիների հետ, և՛ նրանց հարեվանությամբ (Տանայիս-Յաքսարտայի, ներկայիս Սիր-Դարյայի աջ ափին), և՛ սոգդերի հարևանությամբ⁴⁵։ Սկյութների մասին նրանց տեղեկությունները թեև ունեն ընդհանուր բնույթ և լայն աշխարհագրություն, ակնհայտ է, որ որոշ վկայություններում սկյութները գտնվել են XV սատրապության մեր տեղադրության սահմաններում։ Մեր կարծիքով, Ալեքսանդրիա Էսքադան (Հեռավոր) հիմնադրելիս Ալեքսանդրը պետք է գործ ունենար Սակա երկրի բնակիչների հետ։

Ինչ վերաբերում է կասպերին, որոնց մի հատվածը հիշատակվում է XV սատրապության մեջ, ապա նրանք, ելնելով Հերոդոտոսի տեղեկություններից, ևս պետք է տեղադրվեն Պարսից տերության ծայր հյուսիս-արևելքում՝ սակերի, գանդարների և բակտրիացիների հարևանությամբ։ Ինչպես երևում է նրանց սպառազինությունից, կասպերը որոշակիորեն կարող են համեմատվել բակտրիացիների (եղեգնյա տեղական աղեղներ), սակերի (տեղական աղեղներ) հետ, իսկ կասպերի ակինակներով զինված լինելը վկայում է նրանց սկյութական ծագման մասին։ Պատահական չէ, որ Հերոդոտոսը նրանց հիշատակում է գանդարներից և դադիկներից հետո, իսկ կասպերից հետո նշում է սարանգներին։ Վերջիններս գտնվել են XIV սատրապության մեջ, որը տարածվում էր VII սատրապությունից հարավ-արևմուտք։ Ուրեմն, կասպերին կարող ենք տեղորոշել գանդարների հարևանությամբ, նրանցից հյուսիս, Հինդուքուշից հարավ, Աֆղանստանի, Հնդկաստանի և Պակիստանի սահմաններին։ Կասպերը, ամենայն հավանականությամբ, XV սատրապությունում զգալի թիվ են կազմել, որպեսզի լինելով սկյութական ցեղ՝ առանձին հիշատակվեին մյուս սակերի կողքին, կամ էլ իրենց հիշատակությամբ «պարտական» են XI սատրապության կասպերին։ Ելնելով քննությունից՝ կարելի է ընդունել, որ երկու խումբ կասպերն էլ ունեցել են ընդհանուր սկյութական ծագում, ինչը պարզ երևում է հին աղբյուրներից։ Այսպիսով, ասվածը թույլ է տալիս եզրակացնելու, որ կասպերը և վրկանները, համաձայն սկզբնաղբյուրներում պահպանված տեղեկությունների, նույնանում են. առաջինը եղել է ցեղի ինքնանունը, իսկ երկրորդը՝ նույն ցեղի տոտեմը, որն աստիճանաբար դառնում է էթնոնիմ և առանձին դեպքերում կրում հավաքական բնույթ։ Կասպ-վրկանները ցեղային տեղաշարժման արդյունքում հայտնվում են նաև Այսրկովկասում, որ ցույց են տալիս աղբյուրները։ Ուրեմն, XI և XV սատրապությունները գտնվել են Միջին Ասիայում՝ աշխարհագրորեն տարբեր վայրերում, և Այսրկովկասում նրանց տեղադրության յուրաքանչյուր փորձ չի համապատասխանում պատմական իրականությանը։

⁴⁴ Kent R.G., նշվ. աշխ., էջ 137։

⁴⁵ Արիանոս, Ալեքսանդրի արշավանքը, էջ 97, 101, 132, 150-152, Ռուփոս, Ալեքսանդր Մակեդոնացու պատմությունը, էջ 330, 470, 476, 543։

О ЛОКАЛИЗАЦИИ XI И XV САТРАПИЙ АХЕМЕНИДСКОЙ ПЕРСИИ

ХОРИКЯН О. Г.

Резюме

Согласно данным первоисточников, каспии и гирканы идентифицировались: первое является самоназванием племени, второе – тотемом племени каспиев (“волк”), который со временем превращается в этноним собирательного характера. XI и XV сатрапии находились в Средней Азии, занимая разное географическое положение, и всякая попытка локализации их в Закавказье не соответствует исторической действительности.